

समे – 12:25 hrs.

### LG-TB Mukt

उपराज्यपाल मनोज सिन्हा होरें जंदे रोज इक उच्ची सतह दी बैठका च जम्मू-कश्मीर च प्रधानमंत्री टी.बी मुक्त भारत अभियान दी अमलावरी बारै समीक्षा कीती। उनें टी.बी दे खात्मे लेई केंद्र शासित प्रदेश प्रशासन दी बचनबद्धता गी फही पक्का कीता ते मामलें दे पूरी चाल्ली विश्लेषण, इलाज दे नतीजें ते अंतर विभागीय तालमेल दी जरूरते पर जोर पाया। उपराज्यपाल होरें सेहत विभाग ते जिला प्रशासनें गी निर्देश दिते जे ओह जांच च बाददा करन, कमजोर तबकें दी गिनतरी गी तरजीह देन ते घर-घर जाइयै जागरूकता अभियान चलान। बैठक च दस्सेआ गेआ जे जम्मू-कश्मीर नै इस कार्यक्रम दे तैहत 99 फीसद आबादी तगर पुज्ज बनाई ऐ।

<><><><><><>

### CM-Snowfall

मुख्यमंत्री उमर अब्दुल्ला होरें प्रशासन गी हिदायत कीती ऐ जे ओह जम्मू-कश्मीर च मुमकन बर्फबारी दे मददेनजर लोड़चदे जरूरी सारे इंतजाम करिए रक्खन। उनें आखेआ जे इनें तरीकाकारें दा आंकलन ते बर्फबारी दे शुरू होने मगरा गै कीता जाई सकदा ऐ। मीडिया कर्मिं कन्नै गल्ल करदे होई मुख्यमंत्री होरें आखेआ जे खिते च मते चिरें थमां खुशक मौसम बने दा ऐ जेदे करी पानी दी कमी ते प्रदूषण च बाददा होआ ऐ। उनें आखेआ जे बरखा ते बर्फबारी हवा दी गुणवत्ता च सुधार करोग। उनें गलाया जे मुमकन बर्फबारी दे मददेनजर केंद्र शासित

प्रदेश च स्यालै आहले सैलसफा च बाद्दा होई सकदा ऐ। जम्मू-कश्मीर प्रदूषण नियंत्रण कमेटी दे अध्यक्ष वासु यादव होरें आखेआ जे दिसंबर म्हीने च अजें तगर हवा दी गुणवत्ता सरगंधी सूचकांक च सभनें थमां मती 134 आंकी गई ऐ जेड़ी जम्मू गी दरम्याने दर्जे दे प्रदूषण आहली श्रेणी हेठ आंदी ऐ।

<><><><><><>

### Pulse-Polio

राष्ट्रीय टीकाकरण दिसव 2025 तैहत पल्स-पोलियो अभियान जम्मू-कश्मीर च अज्ज यानि 21 दिसम्बर थमां शुरु होआरदा ऐ। इस दौरान 5 बरें तगर दी उमरी दे 19 लक्ख थवां बद्द बच्चें गी पोलियो दियां बूदा पलाइयां जागंन। एदे मगरा 22 ते 23 दिसम्बर गी घर-घर जाइयै बूदां पलाने दा कार्यक्रम ऐ तां जे कोई बी बच्चा खुंजी नैई जा। अधिकारियें दस्सेया ऐ जे एहदे लेई 10 जहार 993 बूथ कायम कीते गे न ते 518 गश्ती दल बी लाए गे न।

<><><><><><>

### Food-Grains Kashmir

कश्मीर च खाद्य सुरक्षा गी बढ़ावा देने दे मकसद कन्नै एफ.सी.आइ भारती खाद्य निगम दी पहली माल गड्डी अज्ज अनंतनाग चीजें-बस्तें आहले टर्मिनल पर पुज्जा करदी ऐ। अजीतवाल रेलवे स्टेशन थमां भेजी गेदी इस रेल च ढकोए दे 21 डब्बें च 1, 384 टन अनाज ऐ। इस गेंs कन्नै घाटी टकोहदा करियै दूर-दरेडे इलाकें च विजन रूकावट ते सस्ती सप्लाई यकीनी बनोग। अफसरें दस्सेआ जे रेल ट्रांसपोर्ट तेज ते सस्ता होग जेदे करियै करसानें दे अलावा

गाहकें गी बी लाह पुज्जोग ते मकामी बजारें दे कन्नो-कन्नी अर्थबवस्था बी तगड़ी होगं  
समूलचे कश्मीर च इस चाल्ली दियें अनाज आहिलियें माल गड्डियें गी विस्तार देने दियां  
स्कीमां चला'रदियां न जेदे कन्नै माल ढोआई ते सप्लाई चेन बेहतर बनी जाडन।

<><><><><><>

### Tenant Verification Portal

जम्मू-कश्मीर पुलस नै कराएदारें दी पंछान ते तस्दीक लेई किराएदार पोर्टल दी शुरूआत कीती  
ऐ। एहदा मकसद हर कराएदार बारै जानकारी लाजमी तौरा पर उपलब्ध करोआना ऐ।  
आकाशवाणी जम्मू संवाददाता दी रिपोर्ट मुजब इस पोर्टल दी शुरूआत एस.एस.पी जम्मू  
जोगिंद्र सिंह होरें कीती। इस मौके पर बोलदे होई उनें आखेआ जे एहदे कन्नै अंदरूनी सुरक्षा  
बेहतर होग ते सुरक्षित माहौल यकीनी बनी सकोग।

<><><><><><>

### Prog. Announcement

आकाशवाणी जम्मू दा क्षेत्रीय समाचार एकांश राश्ट्री करसान दिवस-2025 दे मौके पर 25एं  
मिनटें दा इक विशेष कार्यक्रम पेश करोग। इस विशेष प्रसारण दा विशेसार होग 'राश्ट्र गी  
खुराक देने आहले हत्थें गी सलाम'। इस कार्यक्रम दा प्रसारण मंगलवारें 23 दिसंबर गी दपैहरी  
12 बजे कीता जाहग। इस विशेष प्रसारण च स्हाड़े परौहने होडन कृषि उत्पादन ते करसान  
कल्याण मैहकमे दे संयुक्त निदेशक श्री संजय आनंद, जेहड़े कार्यक्रम दे विशे पर अपने  
माहिराना विचार स्हाड़े कन्नै सांझा करडन। कार्यक्रम दी मेजबानी स्हाड़े एंकर विजय बजाज

होर करा करदे न। इस चाल्ली दे होर सूचना प्रदान करने आहले प्रसारणें गी तुस आकाशवाणी समाचार जम्मू दे मीडियम वेव 303 मीटर यानि 990 किलोहर्टज् ते एफ.एम 103 मेगाहर्टज पर सुनी सकदे ओ।

<><><><><><>

## Whatsapp Hack

इलेक्ट्रानिक्स ते सूचना प्रौद्योगिकी मंत्रालय नै इक चेतावनी जारी करदे होई दस्सेआ ऐ जे घोस्ट पेयरिंग नाs दे इक कैंपेन दा इस्तेमाल Whatsapp अकाउंटें गी हैक करने लेई कीता जा'रदा ऐ। मंत्रालय मुजब साइबर अपराधी विजन कुसै मंजूरी दे पेयरिंग कोड दा इस्तेमाल करियै Whatsapp दे डिवाइस लिंकिंग फीचर राएं Whatsapp खातें गी हैक करा करदे न। एह धोखाधड़ी आम तौरा पर उसलै शुरू होंदी ऐ जिसलै तुसेंगी कुसै जानकार दे नम्बरै परा कोई फोटू भेजेआ जंदा ऐ ते इसी दिक्खने दी अपील दा मैसेज आंदा ऐ। इस मैसेज च इक लिंक हुंदा ऐ जेहड़ा फेसबुक आंडर दे प्रिव्यू कन्नै होंदा ऐ ते अगगे फोन नंबर कन्नै जुड़ी दी इक वेरीफिकेशन प्रक्रिया बक्खी लेई जंदा ऐ। इस चाल्ली अपराधी गी विजन पासवर्ड या सिम स्वैप कीते दे Whatsapp दी पूरी एक्सेस हासल होई जंदी ऐ। मंत्रालय नै लोके गी आखेआ ऐ जे इस चाल्ली दे कुसै लिंक या मैसेज पर क्लिक नेई करन।

<><><><><><>